



# KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

---

## SKINA DI INVERSHONISTA

---

Publikashon 11. 2017

### Kotisashonnan di e bolsa di balor di Kòrsou

*“E úniko manera pa kambia e temperatura permanentemente den e kamber ta pa abustá e tèrmostat di nobo. Di mesun forma, e úniko manera pa kambia bo nivel di éksito finansiero ‘permanentemente’ ta pa abustá bo tèrmostat finansiero di nobo”*

**T. Harv Eker**

Echo: E bolsa di balor lokal di Kòrsou (Dutch Caribbean Securities Exchange òf DCSX) ta wòrdu yamá un bolsa di balor i no un bolsa di akshon. Bo por komprondé e motibu di kon? Hmm... Ta bèrdat, bo a rei korekto! Ta pasobra nan ta ofresé mas ku solamente akshonnan na e públiko pa kotisashon i hasimentu di negoshi. Kaminda akshonnan hopi biaha ta e rekursu núkleo disponibel pa hasi negoshi riba un bolsa, tin un kantidat di otro tipo di balornan ku kual por hasi negoshi. Esakinan por inklú oro, zeta i produktonan manera trigo i asta spèki. Si, bo a lesa esei korekto! Konfia mi, e lista por ta hopi kreativo i interesante. Lokalmente, riba DCSX, bo por hasi negoshi no solamente ku akshonnan, pero tambe ku bono, akshonnan den Funds i pronto ku sertifikado di akshon. Laga nos studia kada unu riba su mes.

Bono – esakinan ta instrumentonan di debe unda e kumpradó ta fia sèn na un entidat – normalmente un kompania òf e gobièrnu – kual e ora ei ta fia e sèn pa un periodo di tempu fiho na un tasa di interes variabel òf fiho ku e intenshon ku nan lo debilbé e sèn fiá na e fiadó ora e periodo di tempu

fiho madurá. E tiponan di aktivonan aki normalmente tin ménos riesgo ku akshonnan i komo tal normalmente ta e rekomendashon preferí pa invershonistanan ku no gusta riesgo òf individuonan ku ta nobo den e mundu di invershon. Un diskushon tokante riesgo lo wòrdu eksplorá den publikashonnan futuro.

Despues bo tin akshonnan den Funds, kual ta unidatnan di propiedat den un Fund. Un Fund ta unda sènnan di invershonistanan ta wòrdu poné huntu pa kumpra rekursionan pa invershon. Manera ferwagt no tur Fund ta igual, tin Funds ku ta invertí solamente den bono – esakinan ta wòrdu yamá Funds di Bono, tin Funds ku ta invertí solamente den akshonnan i bo por topa Funds ku ta invertí den un meskla di tur dos. Naturalmente tin otro tiponan eksótiko manera Hedge Funds, Exchange Traded Funds “ETFs”, Specialty Funds, Funds of Funds, etcetera. E tiponan di Funds ku ta eksistí ta wòrdu kontinuamente ampliá dor di e ingenio di e hendenan ku ta krea nan! Téknikamente kualke kombinashon di seguridatnan ta posibel.

Naturalmente, akshonnan di Funds ta forma un parti usual di e bolsa di balor riba DCSX.

Akshonnan di kompania, òf mas familiarmente yamá akshonnan, ta unidatnan di propiedat den un kompania. Poseé un akshon ta nifiká ku bo tin derecho di propiedat den e ganashinan i entradanan di e kompania. Pasobra no tin ningun fecha di madurashon kaminda a wòrdu primintí ku e sènnan lo wòrdu debolbé na e invershonista manera ta e kaso ku bono, usualmente akshonnan ta wòrdu konsiderá mas riesgá ku bono.

Finalmente, pronto DCSX por kotisá sertifikado di akshon tambe. Esaki ta un tipo spesial di balor lokal ku por wòrdu emití dor di DCSX i ku ta representá por ehèmpel propiedat den un kompania kotisá den eksterior. Pensa por ehèmpel riba e faboritonan internashonal manera Google òf Apple. Loke esaki ta hasi, ta trese e akshonnan internashonal aki na e nivel lokal direktamente aksesibel pa e invershonistanan lokal pa asina nan lo por kumpra e akshonnan aki komo si fuera tabata trata di un akshon kotisá lokalmente aki riba DCSX. Mi ta sigur ku bo ta birando hopi eksitá tokante di esaki i ku rason. Meskos ku nos! I si te ainda no ta kla pa bo, no preokupá. Den e edishon benidero nos lo diskutí kada tipo di balor na su turno pa bo por haña un komprendementu mas profundo di e oportunitatnan i riesgonan ku kada tipo di kotisashon ta ofresé.

Sigui Skina di Invershonista pa tur kos ku bo mester sa tokante Kreashon di Rikesa!

**E editorial aki ta wòrdu presentá na bo pa e DCSX ku kolaborashon di Vertex Investments . Outor di e publikashon aki: Stephanie Shaw CFA, MBA.**



